

## Quart rang per Jon-Fadri Nufer al campunadi svizzer

La fin dall'jamna vargada ein Sursilvanas e Sursilvans separticipai a differentas concurrenzas da cuorsa liunga en Svizra. Als dis da giuventetgna e sport a Maloja ei il Team dil sport da neiv Surselva separticipaus cun in tschuppel curridras e curriders. Ella catgeoria dallas buobas sut 10 onns ha *Chiara Bässler* dall'OG Trin contonschiu il secund rang ed ella categoria sut 14 onns ei *Tylan Michel*, *medemamein* dall'OG Trin, *daventaus bien tierz*.

### Rangs da podest dallas staffettas

Ella staffetta che ha giu liug la dumengia ha OG Trin (*Louis Degiacomi*, *Benjamin Uehli* e *Leo Götz*) contonschiu il secund rang ella categoria dils buobs sut 10 onns. Ella categoria dallas buobas sut 10 onns eis eis ei schizun reussiu all'OG Trin (*Malin Capatt*, *Chiara Bässler*, *Annina Succetti*) da gudignar. Tier las buobas sut 12 onns ha la staffetta mischedada Castrisch/Trin (*Elena Peng*, *Lynn Maissen* ed *Otavia Vonplon*) contonschiu il tierz rang. Il secund plaz ha la staffetta dall'OG Trin (*Rico Maissen*, *Tylan Michel* e *Heikki Piali*) contonschiu ella categoria dils buobs sut 14 onns ed il tierz rang ei reussius all'OG Trin (*Andri Gujan*, *Luin Padrun* e *Niclas Koch*) ella categoria sut 16 onns.

### Buna prestaziun da Jon-Fadri Nufer

Al campunadi svizzer da cuorsa liunga a Zweisimmen-Sparenmoos ha *Jon-Fadri Nufer* dil Club da skis Sedrun-Tujetsch contonschiu il bien 12avel rang el sprint ella categoria sut 18 onns. El ei arrivaus entochen el miez-final. Ella concurrenza singula dil stil classic ha *Jon-Fadri Nufer* schau nudar igl excellent quart rang ella categoria sut 18 onns. Sil victur *Roman Alder* dil Club da skis Bernina Pontresina ha els spiars 44 secundas en quella concurrenza da 10 km. *Cla-Ursin Nufer* dil CS Sedrun-Tujetsch e *Clau Deplazes* dil Club da skis Trun ein buca separticipai. (fmr/hh)